



Participontas e participonts dalla discussiun al podi (da sen.): il moderatur Reto Parpan, Johanna Stadler, Cristian Camartin, Gian-Reto Nufer, Ruth Camenisch e Raimund Klesse.

FOTO HANS HUONDER

Sfurzar d'acceptar suicidi assistiu?

Ina midada dalla lescha da sanadad dil Grischun duei sfurzar tuttas instituziuns sustenidas cun daners publics sco per exempel casas da tgira ni hospesiz d'acceptar il suicidi assistiu. Quella pretensiun ha procurau il mardis sera per ina discussiun fetg animada a Mustér el rom d'in arranschament public davart quei tema. Ils meinis van lunsch in ord l'auter.

HANS HUONDER/FMR

Pil pertuccau, pils parents ed amitgs ei la mort in process fetg emoziunal. Quei ton pli sch'il moribund fa patratgs davart in suicidi assistiu. Igl ei il davos pass ch'ina persuna fa pervia da dolurs, temas ni munconza da perspectiva. Quei pass involva automaticamein era la parentella, amitgas ni amitgs, mo era il personal da tgira dalla pertuccada ni dil pertuccau. Lezs han silsunter da viver cun quella decisiun che stat naturalmein ella cumpetenza suletta dalla persuna che ha giavischau quei. En Svizra ha ei dau 1729 suicidis assistiu igl onn 2023 entras persunas cun dimora en Svizra. 2017 era ei aunc stau 1009.

In sforz?

Il mardis sera ha il Cerchel da lavur «Negin sforz da stuer acceptar suicidi assistiu en instituziuns dil cantun Grischun» arranschau in'orientaziun publica ella Sala Peter Kaiser dalla claustra a Mustér. Dus referents e treis ulteriuras persunas ein separticipadas ad ina discussiun al podi. Il motiv: Il fevrer 2021 ha il Cussegl grond acceptau in'incumbensa che pretendia da formular in artechel ella lescha da sanadad dil Cantun, aschia che tuttas casas e hospesiz che survegnan daners publics ston acceptar il suicidi assistiu en lur localitads. Aschia duess vegnir priu la libertad da schar decider sezzas las instituziuns pertuccadas.

El decuors dils onns 2026 ni 2027 vegn il Cussegl grond a sefatschentar d'in tal artechel el rom dalla revisiun parziala dalla lescha da sanadad. «In tal sforz ei cumbinaus cun resalvas eticas fetg seriusas. El restrenscha la libertad dallas instituziuns e dallas persunas pertuccadas che vulan buca vegnir confruntadas cul suicidi assistiu», di Reto Parpan, menader digl Institut per logoterapia ed anteriur menader dalla psicologia dalla Clinica Beverin.

Ina damonda dalla cultura dalla casa

Ch'ina persuna sefatschenta dil suicidi assistiu, sa haver ils pli differents motivs. Sco Raimund Klesse, specialist per psichiatria e psicoterapia di, pitescha la mesadad dallas persunas pertuccadas d'ina malsogna nuncurabla ni dolurs. Tschella mesadad ei pertuccada surtut da problems e fastedis pischics ni demenza. «La cultura d'ina casa e dalla tgira d'ina persuna gioga in'impurtonta rolla en quei connex. Quella

«In tal sforz ei cumbinaus cun resalvas eticas fetg seriusas. El restrenscha la libertad dallas instituziuns e dallas persunas pertuccadas che vulan buca vegnir confruntadas cul suicidi assistiu.»

Reto Parpan, menader digl Institut per logoterapia ed anteriur menader dalla psicologia dalla Clinica Beverin

cultura ei era in factur da protecciun», di Raimund Klesse ed explichescha: «Ils motivs daco ch'ina persuna vul ir quella via sa esser la malsegirtad, il sentiment d'esser in buordi ni era la tema da pitir e dalla mort. Il patratg dil suicidi ei l'expressiun d'ina crisa.» En tals muments seigi ei impurtont da mussar alla persuna pertuccada ch'ella seigi impurtonta e vegni apprezzada. «En quei connex giogan era ils parents, amitgas ed amitgs in'impurtonta rolla», puntuescha Raimund Klesse.

Ord vesta dil miedi pertuccau

D'in process fetg complex plaidd Cristian Camartin, miedi specialisau per palliative care al Spital cantunal grischun a Cuera. Mintga cass seigi individuals, seigi la malsogna ni era la vegliadetgna dalla pertuccada ni il pertuccau. El Grischun seigi la tgira palliativa s'avanzada sin in bien stan. Palliative care sa succeder a casa, en ina casa da tgira, en in hospesiz ni el spital. 76% dils pertuccai giavischien quei a casa, mo la fin

finala s'adempleschi quei giavisch sulettamein tier rodund 20%. «Palliative care ei ina tgira fetg complexa che cumpeggia da principi il management dils simptoms, la tscherca dallas decisiuns, la reit sociala ed il support dalla famiglia», di Cristian Camartin ch'ei oriunds da Mustér. Gest las famiglias pertuccadas mondien magari en emblidonna. «Cura ch'ina persuna ei en palliative care, ei quei in squetsch era pils parents», constatescha Cristian Camartin. El Spital cantunal grischun seigi suicidi assistiu buca lubius. Persunas che giavischien quei stoppien tscherchar per suenter in auter liug.

Ils meinis ein dividi

Ella discussiun da podi e la discussiun libra suandonta als referats da Raimund Klesse e Cristian Camartin eis ei semussau ch'il tema suicidi assistiu ei fetg dispoteivels. Quei ei il cass surtut pertuccont in eventual sforz per instituziuns d'acceptar quei. Fertion che plirs votums beneventan in tal sforz, han autras persunas argumentau encunter. In dils motivs: Era ils concussadents d'ina casa vivan leu nua ch'in persuna fa suicidi assistiu ed era las collaboraturas ed ils collaboratur ston vegnir a frida cun in tal giavisch e process. Ei savessi esser maneivlamein il cass che bein enqual persuna dil fatg savessi buca acceptar quei e midassi piazza da lavur. Sco Gian-Reto Nufer, meinafatschenta da Puntreis a Mustér di, ha la casa in concept per suicidi assistiu dapi 2017. Entochen oz hagi negin giavischau da far quei pass. Gian-Reto Nufer sedamonda: «Tier nus vegn gielud che tscherca in dacasa pils davos meins ni onns. Eis ei human da far bandunar quellas e quels la casa per in suicidi assistiu?»

Ina gronda sfida

Ruth Camenisch che meina la Casa sogn Giuseppe a Cumpadials rapporta d'ina tut outra situaziun da sia casa: «Nus havein negin concept per il suicidi assistiu en nossa casa. In sforz fust ina gronda sfida e pretendess bia discussiuns, ton pli che nus vivin ina cultura cristiana cun ina caplutta en casa.» Johanna Stadler ch'ei menadra dalla staziun palliativa el Spital cantunal grischun di: «Mintga carstgaun ha honur, era la fin da sia veta. Quella honur lein nus respecar e salvar. Persunas che lavuran el palliative care ston haver gronda carezia per carstgauns, mo tuttina cun ina distanza tier quels.» Terminau igl arranschament dil mardis sera ella Sala Peter Kaiser a Mustér ha Reto Parpan: «Alla fin dalla veta eis ei buca da dar dapli dis alla veta, mo bein dapli veta als dis.»

GLION

Ensemble Tenebrae e Flavio Bundi

Dumengia vegn gl'ensemble vocal Tenebrae da Londra – in dils meglers dil mund – per la tiarza gada el Grischun. Ella baselgia claustrala a Glion presenta el il program «In Winter's House».

Quels dis se presenta gl'ensemble engles Tenebrae Choir ella baselgia St. Martins-in-the-Fields a Londra. Lu viagia el sil continent per presentar il program «In Winter's House». El conta el Museum naziunal german a Nürnberg, lu cuntinuescha la turnea. In di pli tard ei in dils chors pli famus dil mund a Glion. Suenter ch'el ei staus il 2024 l'emprema gada el Grischun, e quei il fevrer a Cuera e gl'uost a Mustér, retuorna el dumengia proxima. Ella baselgia claustrala dallas soras dominicanas da Glion presenta Tenebrae in concert da 70 minutas cul tetel «In Winter's House». Igl ei in viadi musical tras gl'advent e Nadal, ina cumbinaziun da musica chorala veglia e nova, da tuns enconuschents e vuschs contemporanas. Il concert unic include era treis premaidziuns da Flavio Bundi. Sut la direcziun da Nigel Short conta gl'ensemble vocal las cumposiziuns «Neu unviern I», «Neiv e neiv» e «Neu unviern II».



Gl'ensemble vocal Tenebrae da Londra vegn per la tiarza gada el Grischun.

FOTO MAD

Tenebrae Choir sedistingua sigl entir mund cun tuns caulds, profunditad e clarezia sonora. Tenebrae Choir vala sco in dils meglers dil mund e viagia da continent a continent per derasar il plascher dalla musica vocala. Entochen oz ha el produciu pli che 30 porta-tuns e gudignau gronds premis, sco il BBC Award, Gramophone Awards, Grammy. Cun precisium nundetga ed intunaziun perfetga, sco era ina volumen sonor atmosferic, conta il chor cun sias 19 cantaduras e cantadurs. Gl'auditori astga selegrar sin ovras festivas e harmonias commuentontas. (fmr/abc)

Il concert «In Winters' House» cun Tenebrae Choir ei dumengia, ils 7 da december 2025, allas 20.00, ella baselgia claustrala a Glion. Singuls bigliet ein aunc disponibels, reservaziuns mira www.chant.gr.

FLEM

Nadal festiv dalla scola

La scola da Flem seprepara ed exercitescha actualmein per ina fiasta da Nadal ch'ei ha aunc mai dau en quella fuorma. Varga 300 vuschs, tuttas scolaras e scolar, gl'entir team dil personal d'instrucziun, inclus la squadra dil pedel e dalla structura dil gi sco era la direcziun dalla scola, lavuran dapi jamnas vid in program multifar per la fiasta da Nadal dalla scola. Margis, ils 16 da december 2025, allas 19.00, nvida la scola da Flem geniturs, tatts e tats e tuts parents, mo era l'entira populaziun, ad in concert.

Sco quei che la scola scriva en ina comunicaziun, spetga ina mischeida harmonica cun canzuns festivas modernas, tradiziunals, romontschas ed englesas. «Gl'entir program duei resplender il sentiment da cuminonza ed il maletg empalont da nossa scola», scriva la scola da Flem en siu invit. Il concert cun varga 300 vuschs, cun participaziun da pign e grond dalla scola, porchis buca mo puncts culminants musicals. «Ella muossa era tgei forza che nescha sch'ina entira scola ei comunablamain sin tribuna», aschia il meinascola Marc Cathomas. (cdm/fmr)

Il concert da Nadal dalla scola da Flem ei margis, ils 16 da december 2025, allas 19.00 ella halla d'events a Flem Vitg.